

AR EFESIO

Ar he'mi bi 'yot'a ar Pablo bi mēmpa ya me Efeso

Ar nzengwa

1 Nuga dar Pablo ár mpotegi ar tsi Hmu Hesukristo, ngetho njap'u xki ko ár mui Jö bi 'ñexkagi nga pepabi. Di peñ'ahu nunar he'minu gar menguhu Efeso, gi nkuhu ne gi teñhu ar tsi Hmu.

²Jö ma Dadahu ne ma tsi Hmuhu Hesukristo da 'ra'ahu n'ar hogam'ui ne da hwëk'ahu yá ñho.

Jö xa jöpa nu'u togo ñ'emui ar tsi Hmu Hesukristo

³Ga ndöñhu Jö ár Dada ar tsi Hmu Hesukristo, togo xi 'rakagihu gatho ya jöpi xi 'wegagihunu mhets'i, ngetho di n'at'wihu ar tsi Hmu Hesukristo.

⁴Nú'mu hinxki hoktho ar ximhai, Jö xki hwankagihu nga n'at'wihu ar tsi Hmu, ne njap'u nda t'axkagihu, ne hinte ma ts'oki nga pe'su hár nthandi'ö.

⁵Jö pe'sa n'ar döta mhöte, ne xki hñuts'i nda tedegihu hár ndöte ar tsi Hmu Hesukristo, ngetho njap'u xki beñ'ö.

⁶Nö'ö bi ko ár mui ba pehna ár hmöka T'u bi tedegihu, ne njap'u xa

ga ndömfu ár thuhu ga beñhu ár nhwëki bi 'rakagihu.

⁷Bi mehna ár T'u, bi nö'ma ár ji bi pumga ma ts'okihu, ne bi gutka ma thaihu. Njap'u bi zimgagihu hár 'ye ar ts'oki, ngetho xa döta ár nhwëki Jö.

⁸Xa bi hwëgagihu n'ar hoga mfeni ne n'ar döta mfödi.

⁹Ne bi za da pöhu nö'ö himi tsä nda fö mam'et'o, tema xki ko ár mui Jö nda 'yot'e. Gese xki benga njap'u,

¹⁰nda njapa ar tsi Hmu Hesukristo nda ndö, di huxa mañö gatho nu'u bi 'bu mhets'i ne gatho nu'u 'bukwa har ximhai. Njap'u ma da thogi nu xta zonga ar pa xi hñuxa Jö.

¹¹Jö xki beñ'ö nda hñuxkagihu nga höñhu yá ñho, ngetho di n'at'wihu ar tsi Hmu. Ha Jö ot'a gatho nö'ö xi benga hár mui.

¹²Jö bi hwankagihe m'et'o nga jamfihe ar tsi Hmu Hesukristo ne njap'u nga ndömfu ár thuhu.

¹³Ne nu'ahu xka 'yoxu ar mhö majöni, nunar mhönu nonga ri mpohöhu. Ne nga jamfihi ga n'at'wihu ar tsi Hmu Hesukristo, bi thus'ahu ár Hñö Jö ha ri muihu ngu

n'ar nthixt'i yá me'ti'ihü Jö, ngu xki ñötkagihü.

¹⁴Ár Hñö Jö gehnu ngu n'ar ñho xi m'et'ogihü yá bötsigihü Jö, hönse ga to'mhü da zo ar pa da zixkagihü n'agitho ma ga 'bühwihü. Gatho xi 'yot'a Jö, ne njap'u nda t'e'spabi ár nsu.

Ar Pablo adi da t'umba ar hoga mfödi ne da sokwa yá da ya gamfi

¹⁵Jange nuga nú'mü nda ode xka jamfihü ar tsi Hmu Hesukristo, ne xi zo ma gu xa gi möhü nu'u ma'ra ya gamfi,

¹⁶hindi tsaya di umba njamödi Jö, ne di api da max'ahü,

¹⁷da 'ra'ahü ar hoga mfödi, ne da xok'a ri dahü gi pöthwü ár m'ui ár Dada ma tsi Hmuhü Hesukristo 'bu här nsunda.

¹⁸Di apa Jö n'ehe da yot'a ri mfenihü gi pöhu xiñho te gatho di to'mhü ngetho xi zonkagihü, ne gi pöhu tengu ár nzatho ne ár döta ya ñho da 'raju xka m'ühwihü, nuya xta ñ'emüihü.

¹⁹Ne di apabi gi pöhu tengu ár döta ár ts'edi mpe ha ri mfenihü. Getnu ar döta ts'edi xi utkagihü,

²⁰nú'mü bi japi bi nte man'agi ar tsi Hmu Hesukristo, ne bi guxa habu xki t'ahwi nu'u xi du, ne bi ñexa här ñ'ei núnu mhets'i habu bi 'bühwi'ö.

²¹Ne bi umba n'ar döta nsu töta gatho ya ndö, nu'u hö yá ts'ut'wi, nu'u ja yá ts'edi, nu'u ja yá nsu, ne gatho nu'u nhomba yá thuhu har ximhai, töte ár nsu nuya payu ne hiñham'u da göts'i.

²²Ne bi hñuxa da ndö gatho nö'ö te jawa ne 'bui, ne bi ñex'ö ngu ár ñöxhmu ar nijö.

²³Ha nu ar nijö jwatwabi da nxoge ár ndo'yo, ha nunar tsi Hmu jwatwabi da nxoge gatho nö'ö te ja ne te 'bui.

2 Nu'ahü xka m'ehmöhü mam'et'o ha ya ts'oki, ne ngi 'bühü har ts'om'ui, pontho hinge ngi tehu, ha nupya Jö xi 'ra'ahü n'ar 'ra'yo te.

²Ngü 'bühü njap'u ngetho ngi temfü ár m'ui ar ximhai. Ne ngi pepabihü ár ndö ya ts'ondöhi, pe'sa ár ts'edi har ndöhi, ne pumbyá mfeni ya me'sku.

³Mam'et'o gathogihü ngu 'bu'u n'ehe, ndi umbabihü gatho nö'ö mi ne ma ndo'yohü, ne ndi othu gatho nö'ö mi benga ma mfenihü. Jange nuju hönse ár kwe Jö ndi to'mhü, ngu to'ma nu'u hinxi ñ'emüi.

⁴Ha Jö xa döta ár nhwëki ne xa bi mökagihü.

⁵Jange ngu bi japi bi nte man'agi ar tsi Hmu Hesukristo, njap'u nuju n'ehe, bi 'raju n'ar 'ra'yo te, ngetho xki m'e ma tehu har ts'oki, pontho ngu xta tumhöhu, ne Jö bi hwëgagihü, bi 'raju ar mpohö.

⁶Ne ngu bi guxa ar tsi Hmu Hesukristo, njap'u bi guxkagihü n'ehe, ne bi ñexkagihü ga 'bühwihünu mhets'i.

⁷Bi 'yotkagihü njap'u, mi honga nuya pa di ñep'u da födi hangu ar ñho xi hwëgagihü, bi ko ár müi ba penkagihü ar tsi Hmu Hesukristo.

⁸Ngetho Jö bi hwëgagihü ar mpohö nú'mü nda ñ'emüihü. Himbi pokagihü ma ts'edisëhu, gehnu n'ar nt'uni Jö.

⁹Hinto xi pose yá hoga 'befi. Nu'mü bi njap'u, tsä da 'ñexhmö ár nsu 'mü.

¹⁰Jö go bi mengi bi hyógagihu ma'ra'yo ngetho di n'at'wihu ar tsi Hmu Hesukristo, ne njap'u nga othu n'ö ar ñho xki 'yegagihu Jö nga othu.

Nunár ndöte ar tsi Hmu Hesukristo bi 'yot'a ar ñhogamui

¹¹Jange nu'ahu hingar xodyohu, beñhu mam'et'o hinge xki thus'ahu ar nsegi ha ri ndo'yohu ngu pe'sa ya xodyo. Jange mi eñ'ahu ngar ts'oktehu, mödi nunar nseginu mi huxase ya jö'i.

¹²Mam'et'o hinge ngi 'buhwihu ar tsi Hmu Hesukristo, ngi 'buhu yap'u. Hinge ngar menguhu Israel, ne hinge ndi 'ñep'ahu nuya ñhöt'i xki nkohwi'u. Hinte ngi to'mhu, hinge ngi pöhu Jö, ngi 'busehu har ximhai.

¹³Mapa'ö ngi 'buhu yap'u xka hyehu Jö. Ha nupya xka ñ'emuihu ar tsi Hmu Hesukristo, xi ja'ahu xka kwathu, ngetho bi n'ö'ma ár ji har pont'i.

¹⁴Nuje dar xodyohe ne nu'ahu hingar xodyohu, nú'mu mi du ar tsi Hmu Hesukristo bi text'a ar jödo nt'utsa xki 'wegagihu. Njap'u nda za ngar n'ada ar hninihu ne nga ñhogamuihu n'a ngu n'a.

¹⁵Nú'mu mi ts'utwa ár ndo'yo har pont'i, ge'mu bi hwata ar nt'utsa, ngetho bi hñökwa ár ts'edi ya 'bepate ne gatho yá nt'umbi. Mi yoho ya hnini bi hyoka n'ase, ngetho n'at'wu teñ'ö ba e ar hogam'ui.

¹⁶Gehnu har pont'i bi hwata ar nt'utsa mi pe'sa nu'u yoho ya hniniyu, bi mhödi ne bi

ñhogamuiwi Jö, ngetho bi n'atwi ndo'yo'u ar tsi Hmu Hesukristo.

¹⁷Jange ar tsi Hmu Hesukristo ba hönkagihu ar hoga mhö xta ñhogamuiwihu Jö, nu'ahu ngi 'buhu yap'u, ne nuje ya xodyo ndi 'buhe get'utho.

¹⁸Ngetho bi ungár te ma tsi Hmuhu Hesukristo, gathogihu ngu ya xodyo ne nu'u hingya xodyo, da tsá ga kuthu habu bi 'bu Jö ma Dadahu, ngetho di 'buhwihu ár Hñö Jö mahyegi xi t'akagihu.

¹⁹Jange nupya hingar n'añ'ohu, ne hingar nzohohu. Gar menguhu ár hnini Jö ngu gatho nu ma'ra ya gamfi, ne yá bötsi'ihu n'ehe.

²⁰Ne mahyegi di 'buhu hár nijö Jö 'yo di thoki. Numa tsi Hmuhu Hesukristo ñhehwi ar mudido. Nuje yá mpotegihe ne nu ma'ra yá m'ehni Jö, di janguhe ár wa ar jödo.

²¹Gathogihu ya gamfi di njanguhu n'ar ngu thoki, 'yo di hets'i mahyetho ya do, ne da ho n'ar nijö xint'axi ngetho n'at'wi di 'buhwihu ar tsi Hmu.

²²Ngu'ahu ne nguje di n'at'wihu ar tsi Hmu Hesukristo, ne di 'yo di tehu mahyegi gatho ma'ra ya gamfi, ga tsoñhu ngu ár nijögihu Jö habu 'bu ár Hñö.

Ar 'befi bi t'umba ar Pablo da hñö'spa ar hoga mhö nu'u hingya xodyo

3 Nuga ar Pablo, di owa har fadi ngetho di zo'ahu ár hoga mhö ar tsi Hmu Hesukristo nu'ahu hingar xodyohu.

²Zage gi pöhu bi hwégagi Jö ar 'befi ga hös'ahu ar hoga mhö.

³ Jö bi utkagi nö'ö hinxki fö mam'et'o, ngu xta ot'ahü n'a tsi tui.

⁴ Nu xki néhü ma gi pöhu tengu dí pödi nö'ö himi fö mam'et'o, tema nda 'yot'a ma tsi Hmuhü Hesukristo.

⁵ Nunar mfeninü xki jwatatho, hinte ma jö'i xki t'uti, ngu xi utwabipya ár Hñö Jö yá hoga mpote ne yá m'ehni Jö.

⁶ Xi t'utkagihe, nu'u hingya xodyo mahyegiwi nu ma'ra, ma da hñönga ya ñho n'ehe, ne da n'adar ndo'yowi ya xodyo. Ne da ñnehwi yá ñhöt'i pes'u, ngetho mi 'yo ar hoga mhö mi mhö, bi jamfi ar tsi Hmu Hesukristo.

⁷ Nunar mhö'ö Jö bi hñuxkagi ga mö. Bi njap'u ngetho bi hwägagi ár nt'uni, ne nunár döta ts'edi bi mpe ha ma müi.

⁸ Xi t'aka nunar 'befinü, mödi hinda tsä ga ñhux'be nu ma'ra ya gamfi, di ko ya hai. Xi nhwägagi nunar 'befinü, ga hö'spabi nu'u hingya xodyo ya hoga mhö nonga gatho ya ñho pe'sa ar tsi Hmu Hesukristo, hingi tso xoge ma mfenihü.

⁹ Ne ga ot'wa ar 'ñu gatho nö'ö tema xki bengä Jö nda 'yot'e ne xki 'ñögi, nú'mü hinxki hoktho gatho nö'ö te japyä.

¹⁰ Ne njap'u da nheki hár nijö nuya ár nzeye ár mfödi Jö, ne da bö nu'u togo bi the yá nsu ne nu'u togo bi the yá ts'edinü mhets'i.

¹¹ Gehnü ar mfeni xki bengä Jö mam'et'o, m'efa bi 'ñu hár te ma tsi Hmuhü Hesukristo.

¹² Ngetho di ñ'emüihü ar tsi Hmu Hesukristo, hinga ntsuhü ne hinga ntsahü ga kwathü ga ñöwihü Jö.

¹³ Jange di a'ahü, hingi tu ri müihü gi hanthü di tho ya nt'utsa ngetho di hös'ahü ar hoga mhö. Njohyahü, gehnü es'ahü ri nsuhü.

Nunar döta mhöte hingi tsä da zo ma mfenihü

¹⁴ Jange di ndandihmö hár nthandi ár Dada ma tsi Hmuhü Hesukristo.

¹⁵ Gehnü ár Dada togo bi umbä yá te gatho ya m'ui 'bukwa har ximhai, ne gatho nu'u 'buhnü mhets'i.

¹⁶ Di apabi ngu ár nt'eni yá ñho pe'sa hár nsunda, da zet'a ri müihü hár Hñö Jö gi 'buhwihü.

¹⁷ Di apabi n'ehe da m'u ha ri müihü ar tsi Hmu Hesukristo, ngetho gi jamfihü, ne njap'u gi m'athü xiñho hár mhöte.

¹⁸ Ne gatho nu'ahü, ngu nu ma'ra ya gamfi, da tsä gi pöhu tengu ár nxidi, ár ma, ár ñhe ne ár ñhets'i ár mhöte ar tsi Hmu Hesukristo.

¹⁹ Ne gi pöthwü nunar döta mhötenü hinto tsä da zo xiñho hár mfeni, ne xa da ziñ'ahü ár m'ui Jö.

²⁰ Nsunda Jö togo pe'sa ar ts'edi da 'yot'a gatho nö'ö ne'ö, töta ár nzeye nö'ö tsä da zo ma mfenihü ga afü. Gathonü ot'a ár ts'edi mpe ha ma müihü.

²¹ Dá nsundabi ar nijö 'buhwi ar tsi Hmu Hesukristo hyax'mü ne hiñham'u da göts'i. Dá njap'u.

Di n'at'wihü ár Hñö Jö

4 Nuga di owa har fadi ngetho di mömba ár mhö ma tsi Hmuhü, di a'ahü gi 'buhü ngu di 'ñepi da m'u nu'u togo xi ts'ohni da mbötsi Jö.

²Yo gi ñ'exu, nts'a'mthohu. Pe'su n'ar hogamui ne ar ts'eti, ne gi mhöhu n'a ngu n'a.

³Nu'ahu gi n'asehu ngetho n'ada ár Hñö Jö 'bu ha ri muihu. Jange umba ri muihu gi pe'su n'adar mfeni, ne gi 'buhu n'ar hogam'ui.

⁴Ngetho di n'adar ndo'yohu, n'adár Hñö Jö 'bu ha ma muihu, jangu xi ts'onkagihu n'ehe ga pe'su n'adar ndo'mi.

⁵N'adar tsi Hmu di zohu, n'ada ma ñ'emuihu, ne n'adar xixthe xta höñhu.

⁶N'adar Jö togo ma Dadahu gatho nu'u di 'buhu. Ár ts'edi hexkagihu, ne 'rakagihu ár mfats'i di gathohu, ne 'bu ha ma muihu.

⁷N'a ngu n'a bi hwëgagihu ar tsi Hmu Hesukristo n'ar hogant'uni ngu ár nt'eni'ö.

⁸Jange bi thogi ngu mönga ár T'ofö Jö habu enö:

Ar tsi Hmu bi ntöte ne bi boxa mhets'i, bi zixa nu'u xki döhö, ne bi hyemba ya nt'uni ya jö'i.

⁹Te di bönga nö'ö enö bi boxa mañö mhets'i. Ne da ñ'enö, nö'ö mi 'bu mhets'i ba kökwa har ximhai.

¹⁰Nö'ö togo ba e har ximhai bi mengi bi boxa man'agi har ngöxa mhets'i, ne njap'u bi hyexta ár nsunda xoge nö'ö xi thoki.

¹¹Gese bi 'ñex'ö 'ra ngu yá mpote, ma'ra yá m'ehni, ma'ra nda mömba ár hoga mhö, ma'ra da mfä'yo ha yá nijö, ma'ra da utwa ár mhö Jö.

¹²Gathoyu faxte da ñöxa ár ñ'emui ya ku, ne da mepa Jö'u n'ehe. Ne njap'u da te ar nijö, gehnu ár ndo'yo ar tsi Hmu Hesukristo.

¹³Njap'u ga jawahu gatho ga pe'su n'adar ñ'emui, ne ga pötwabihu

xiñho ár T'u Jö. Ga tsoñhu ga ñhogajö'ihu, ne gatho ga ñhehwihi ár m'ui ar tsi Hmu Hesukristo.

¹⁴Hindi hñöxkagihu ya t'ulo bötsi hingi pöthetho, to gatho tsa da kadi da mewi temba yá jamfi. Nuya jö'iyu ju ar nhemhñö ne ya ts'omfeni japa ya ku da denga nö'ö hingi ho.

¹⁵Nö'ö ma ga othu, ga teñhu nö'ö majöni ne ga pe'su ar mhöte. Njap'u da ñöxa ma jamfihu, ne ga ñhehwihi ar tsi Hmu Hesukristo togo ár ñöxhmu ar nijö.

¹⁶Nunar nijö hömba ár ts'edi ar tsi Hmu, ne njap'u n'a ngu n'a ya ku 'yo di maxa ma'ra, ngu ar 'befi xi t'umbabi. Ne 'yo di te, ne da me'sa yá ts'edi tenga ar mhöte.

Ar 'ra'yo m'ui t'akagihu ngetho di 'buhwihi ar tsi Hmu Hesukristo

¹⁷Di 'bep'ahu hár thuhu ma tsi Hmuhu, gi hyehu gi tembathohu yá m'ui nu'u hinxi ñ'emui, ngetho hinte mañho beñ'u.

¹⁸Xi me yá ñö, hingi ne da hñöñ'u ar te unga Jö, ngetho hinte pö'u ne xi got'a yá mui.

¹⁹Bi 'be yá mfeni, bi ñ'ent'atho'u bi 'yot'a gatho nu'u ya ts'oki mi ne'u, ne gor johya'u da 'yot'a nö'ö xints'otho.

²⁰Ha nu'ahu hinxi ut'ahu njap'u ar tsi Hmu Hesukristo,

²¹nu'mu xa majöni xka 'yohu nö'ö xi möñ'ö, ne xka 'yoxu nö'ö xa majöni ut'ö.

²²Nö'ö ar m'ui ngi pe'su maham'u, hyehup'u n'agitho. Ngu n'ar ze dutu k'othu 'yeñhup'u, xi zu ar ts'o'yo, kate ot'a ar ts'oki.

²³Hyehu da n'a'yo ri muihu ne ri mfenihu.

²⁴Ne 'buhū nunar 'ra'yo m'ui xi t'a'ahū, ngu n'ar 'ra'yo he gi hyehū xi thoki di hñōxa Jō, xa majōni ar hogajō'i ne xint'axi.

²⁵Jange hyehup'u ar nhemhñō. Mōñhū nō'ō majōni nū'mu gi ñōwi ri ñ'owihū, ngetho di n'adar ndo'yohū n'a ngu n'a.

²⁶Nu'mu da mbō ri kwehū, yo ma da hya'ahū ri mfenihū gi 'yothū n'ar ts'oki. Nhogamuihū, yo gi to'mhū da tho ar pa.

²⁷Yo gi hofu da hya'ahū ar ts'ondōhi.

²⁸Nō'ō togo mar bë, dá hyep'u ar mfë. Dá hyonga n'ar hoga 'befi, ne njap'u da me'sa teme da mfaxkwi nō'ō togo hinte pets'i.

²⁹Yogar ts'onehū, hyoñhū hanja gi ñōhū xiñho, ne njap'u nu'u togo da 'yox'ahū da mats'i ne da numañho.

³⁰Ne yo gi tsothwū ár mui ár Hñō Jō. Xi thus'ahū ngu n'ar nkohi, ne xta zonga ar pa da ts'iñ'ahū, da fōtho yá bötsi'ihū Jō.

³¹Hyehup'u gatho ar ntsotmui, ar kwe, ar nt'utsa, ya mhafi, ya ts'ate, ne gatho ya ts'omfeni.

³²Nō'ō xiñho gi 'yothū, ñhogajō'ihū n'a ngu n'a, mpe'su ar nhwëki mpuñhū n'a ngu n'a, ngu ar tsi Dada bi pumgagihū mi unga ár te ar tsi Hmu Hesukristo.

'Buhū xiñho ngetho yot'ahū Jō

5 Umba ri muihū gi temfu ár m'ui Jō, ngetho go yá hmōka bötsi'ihū.

²'Buhū gi mhōhū n'a ngu n'a ngu bi mōkagihū ar tsi Hmu Hesukristo. Bi gutka ma thaihū nū'mu mi unga ár te har pont'i, ngu n'ar m'oñho yuni xiñho m'o'spa Jō.

³Nu'u xka jamfihū, yo gi 'bengwihū n'ar jō'i nō'ō hingo ri nthōtihū, yo gi benthū nō'ō xints'otho, yo xa gi mōhū ar bojō, hingi noñhū nuya ts'okiyū. 'Buhū ngu di 'ñepi da m'u n'ar gamfi.

⁴Yo gar ts'onehū, yo gi ñōhū ñ'entho, yo gi ñ'ont'uhū, ngetho hingi ho da 'yot'a njap'u ya gamfi. Nō'ō xiñho gi 'yothū, umfu njamōdi Jō.

⁵Pōhū xiñho hinda ma da yut'a da ndōwi ar tsi Hmu Hesukristo bi 'buhwi Jō, gatho nu'u 'bengwi ya jō'i, nu'u tenga ar ts'oki, ne nu'u xa mö ar bojō, pontho ndōñ'u.

⁶Yo ma gi ñhehū togo da hya'ahū ya nemhñō, ngetho nuya ts'okiyū japi da e ár kwe Jō da zū nuya me'sku.

⁷Jange yo gi ñ'owihū nu'u togo ot'a nuya ts'o'befiyū.

⁸Mam'et'o ngi 'buhū har 'bexui, ha nupya gi 'buhwihū ar tsi Hmu har hyats'i. 'Buhū ngu nu'u 'yo hár hyats'i Jō.

⁹Ngetho nuya 'bu har hyats'i, ár Hñō Jō fats'i da ñhogajō'i, da me'sa ar hogam'ui, ne di mönga nō'ō majōni.

¹⁰Umba ri muihū gi 'yothū nō'ō numañho ar tsi Hmu.

¹¹Ne yo gi temfu yá 'befi nu'u togo 'bu har 'bexui, hinte ár ñho. Nō'ō gi 'yothū, xipabihū hingi ho nō'ō pe'u.

¹²Ngetho n'ar m'etsa ga noñhū nō'ō ot'u ñ'ontho.

¹³Ha nu'mu da t'e'spa ar ñot'i nuya ts'o'befi pe'u, nu'mú hō, da fōdi tema di bonga nuya te pe'u, ngetho har ñot'i ka nhekinu xoge.

¹⁴Jange xi t'enō njawa:

Nu'ge gi öhö, nuhu,
ponga nup'u hár t'agi nu'u xi du,
ne ar tsi Hmu Hesukristo da
yot'a'i.

¹⁵Pöhu xiñho hanja gi 'buhu.
'Buhu ngu nu'u pe'sa yá mfödi,
hingi 'buhu ngu nu'u hinte pödi.

¹⁶Yo gi huhu, umba ri müihu gi
'yothu nö'ö xiñho, ngetho nuya payu
di 'buhu xints'otho.

¹⁷Yo gi ñhehutho, umba ri müihu
gi pöhu nö'ö ne Jö gi 'yothu.

¹⁸Yo gi ntihi, ngetho ar mihni
ma da ja'ahu gi nts'oku. Nö'ö xiñho
gi 'yothu, hyoñhu xa di ziñ'ahu ár
Hñö Jö.

¹⁹Nú'mu gi ñöhu, noñhu ya hoga
nsadi, ya jöñhö ne ya hoga thuhu.
Tuthwu ne gi 'yent'a ri müihu gi
xathu Jö.

²⁰Gatho nö'ö di 'ñep'ahu, umfu
njamödi Jö ar Dada hár thuhu ma
tsi Hmuhu Hesukristo.

N'othu n'a ngu n'a ri kuhu

²¹Ngetho gi tsufu ar tsi Hmu,
ñ'othu n'a ngu n'a.

²²'Behñöhu xka nthöthu, 'yothu ri
dömesehu ngu gi othu ar tsi Hmu
Hesukristo.

²³Ngetho ar döme gehnu ár ñöxhmu
ar 'behñö, ngu ar tsi Hmu Hesukristo
ár ñöxhmu ar nijö, ne ar nijö gehnu ár
ndo'yo ar tsi Hmu togo ár Pohöte.

²⁴Jange ngu ar nijö öta ar tsi Hmu
Hesukristo, njap'u nuya 'behñö da
'yot'a gatho nö'ö te da xipa yá döme.

²⁵Dömehu, mö ri 'behñöhu ngu
ar tsi Hmu Hesukristo bi mö ár nijö,
ne bi unse ár te bi pohö.

²⁶Bi du, ne njap'u bi hñögagihu
ma ts'okihu, mi xuga ma müihu ndi
o'sfu ne ndi othwu ár mhö.

²⁷Bi xugagihu ne nda 'babgagihu
hár nthandise ngu ár nijö xa nzatho,
hinte xi jaxt'i ne hinxi guxt'i, da
thandi dar nt'axi ne xa 'bui xiñho.

²⁸Njahup'u nu'ahu gar dömehu
n'ehe, möhu ri 'behñöhu ngu gi
möse ri ndo'yohu. Nö'ö to mö ár
'behñö, mhöse n'ehe.

²⁹Ngetho hinto utsase ár ndo'yo,
gi pöhu 'wini ne su, jangu ar tsi
Hmu Hesukristo su ar nijö.

³⁰Geju ár ndo'yogihu ar tsi Hmu
Hesukristo, ne n'a ngu n'a dar n'a
xenigihu ár ndo'yo'ö.

³¹Jange enga hár T'ofö Jö, ar
ñ'ohö da zop'u ár dada ne ár nönö,
ne da m'uhwi ár 'behñö, ne nuya
yohoyu ma da n'atho.

³²Xa xi ñhembu nunar nt'utinu,
mödi nuga di heka ar tsi Hmu
Hesukristo ne ár nijö.

³³Jange ma ga xi'ahu: N'a ngu n'a
möhu ri 'behñöhu ngu gi mhösehu,
ne nuya 'behñö dá 'yöta yá döme.

6 Bötsihu, 'yothu ri menguhu
ngetho gi 'buhwihu ar tsi
Hmu. Gehnu xiñho'ö.

²'Yothu ngu mönga ár mhö Jö habu
enö: 'Ñe'sfu ár nsu ri dada ne ri nönö,
gehnü ar 'bet'o 'bepate ñöt'ahu ar ñhöt'i.

³Nunar ñhöt'inu mö gi pe'sa n'ar
hogam'ui ne gi 'bukwa nzeýe ya pa
har ximhai.

⁴Ha nu'ahu gar dadahu ne nu'ahu
gar nönöhu, yo gi pomfu ár kwe ri
bötsihu. Hñöjwu nö'ö hingi ho ne
uthwu ár ñu ar tsi Hmu.

⁵Nu'ahu gi m'egohu, 'yothu ri
hmuhuwa har ximhai. 'Ñe'sfu ár
nsu, ne tsit'a ri müi gi pefu, to da
'ñenö gi pefu ar tsi Hmu Hesukristo.

⁶Mpehu xiñho, hinge honse nú'mu
hant'ahu ri hmuhu gi ne gi kohu

xiñho. Ngu yá 'bego'ihü ar tsi Hmu Hesukristo, di tsit'a ri müihu gi 'yothu Jö.

⁷Xa gi nesehu gi mpehu, hinge jangu gi pefu n'ar jö'i, 'yothu wande gi pepabihu ar tsi Hmu.

⁸Beñhu, nunar tsi Hmu ma da 'ra'ahu ar njut'i, ngu nö'ö ar ñho xka 'yothu n'a ngu n'a, wa gi 'ñehu ri hmuhu, wa gar hmuhu.

⁹Nu'ahu gar hmuhu, 'yot'wabihu ar ñho ri 'begohu, yo gi pihu. Beñhu, nu'ahu ngu'u bi 'bu n'a ri Hmuhu mañö mhets'i, ne nö'ö hingi hwanta ya jö'i.

Ga hehu ar he xi 'raju Jö ngu n'ar ndogu

¹⁰Nupya tsi kuhu, gi hömfu ár döta ts'edi ar tsi Hmu, gehnu da zet'a ri müihu.

¹¹Ngu ñhoka n'ar ndogu di ma har tuhni, njap'u nu'ahu n'ehe, hyehu ar he xi 'ra'ahu Jö, da max'ahu gi tsethwu yá nhemhñö ar ts'ondöhi.

¹²Ngetho hindi ntunkwihu ma mijö'ihu. Di ntöxkwihu nu'u pe'sa yá nsu, ne pe'sa yá ts'edi, ne ya ndö har 'bexui nuya payu, ne gatho nuya ts'ondöhi bi nsanga mañö har ndöhi.

¹³Jange hyehu xiñho nö'ö ar he tuhni xi 'ra'ahu Jö, ne gi tsethu nuya pa gi thohu ya thogi. Ne xki ntötehu, yo ma gi ñhehu da hyom'ahu hai.

¹⁴Jange umba ri müihu gi tsethu, ne gi pe'su nö'ö majöni ngu n'ar bö't'i xka nguthu xiñho, ne ar hogajö'i ngu n'ar hebojö tak'ahu.

¹⁵Ngu su yá wa n'ar ndogu da za da ñ'o xiñho har tuhni, njap'u nu'ahu n'ehe, ñhoju habu gatho gi

möhu gi mömfu ár mhö Jö unga ar hogam'ui.

¹⁶Ne gi pe'su ar jamfi, ngu n'ar nthaki gi tajwu gatho yá nk'ahni ngu ya tsibi bi emp'ahu ar ts'ondöhi.

¹⁷Gi suhu ar mpoho, ngu n'ar fuibojö da dak'ahu ri ñöhu. Ne gi hñöhu ár mhö Jö, ngu n'ar ndojwai 'ra'ahu ár Hñö Jö.

¹⁸Ne hyax'mu hinda za'ahu gi 'yafu Jö gi hömfu ár ts'edi ár Hñö. Hingi tsaya gi to'mthohu da max'ahu. Hinge honse nu'ahu, 'yafu da maxa gatho nu ma'ra ya gamfi n'ehe.

¹⁹Yapabihu Jö da maxkagiga n'ehe. Nú'mu xka ñö, da t'aka tema ga mö. Ne hinga ntsu ga zo ya jö'i, ne da zo yá mfeni nunar hoga mhö hinxki fö mam'et'o.

²⁰Jange nuga dar m'ehni di mönga ar hoga mhö, ne xi thutka nuya bojöyu. 'Yafu Jö da maxkagi hinga ntsu ga mönga nunar hoga mhönu, ngu xiñho ga ñö.

Ya ngöxanzengwa

²¹Di peñ'ahu ma hmöka ku Tikiko, gehnu da xi'ahu tema di pefi ne tengu di thokwa. Nu xta zomp'u, nuhu ngu n'ar hoga 'bego ar tsi Hmu.

²²Jange di peñ'a'ihup'u da met'ahu tengu di 'buhewa, ne da hup'a ri müihu.

²³Jö ar Dada ne ar tsi Hmu Hesukristo da jöp'ahu mahyegi gatho nu ma'ra ya ku, gi 'buhu ter entho, gi mhöhu n'a ngu n'a, di pëwi ar jamfi.

²⁴Jö da hwëk'ahu yá ñho, gatho nu'ahu gi möhu ar tsi Hmu Hesukristo ha n'ar mhöte hingi thege. Dá njap'u.